

templo. Sa wala pa matukod ang templo sa Kyiv, siya ug ang uban sa iyang branch misakripisyo pagbiyahe og 36 ka oras sakay sa bus aron makatambong sa templo kausa sa usa ka tuig didto sa Germany. Kining matinuoron nga mga Santos nagtuon sa kasulatan, nanganta sa himno, ug naghisgut sa ebanghelyo samtang nagbiyahe. Si Katya miingon nako, “Dihang miabut na mi sa templo, andam na kami nga modawat unsay ihatag sa Ginoo namo.”

Kon gusto nato nga madawat ang tanang panalangin sa Dios nga abundang gitanyag, ang atong dalan kinahanglan paingon ngadto sa templo. Ang mga templo usa ka pagpahayag sa gugma sa Dios. Siya midapit natong tanan nga moadto, magkat-on bahin Niya, mobati sa Iyang gugma, ug modawat sa mga ordinansa sa priesthood nga gikinahanglan sa kinabuhing dayon uban Niya. Matag pakigsaad gihimo sa tinagsa-tagsa. Matag dakong kausaban sa kasingkasing mahinungdanon sa Ginoo. Ug ang inyoha makahimo og dakong kalainan alang kaninyo. Kay kon kita moadto sa Iyang balaan nga balay, kita “sinangkapan sa [Iyang] gahum, . . . [Iyang] ngalan . . . diha [kanato], . . . [Iyang] himaya . . . maglibut [kanato], ug ang [Iyang] mga anghel mobantay [kanato].”⁵

Akong ipakigbahin ninyo ang akong sigurado nga pagsaksi nga ang atong mahigugmaong Amahan sa Langit buhi. Pinaagi kini sa Iyang Pinalanggang Anak, si Jesukristo, nga matag paglaum, matag saad, ug matag panalangin sa templo matuman. Hinaut nga kita dunay hugot nga pagtuo sa pagsalig Kaniya ug sa Iyang mga pakigsaad, ako nag-ampo sa pangalan ni Jesukristo, amen. ■

MUBO NGA MGA SULAT

1. David A. Bednar, “Madungganon nga Paghupot og usa ka Pangalan ug Katungdanan,” *Liahona*, Mayo 2009, 98.
2. Linda K. Burton, “Gikinahanglan: Mga Kamot ug mga Kasingkasing sa Pagpadali sa Buhay,” *Liahona*, Mayo 2014, 123.
3. Thomas S. Monson, “Ang Balaan nga Templo—ang Suga sa Kalibutan,” *Liahona*, Mayo 2011, 92.
4. Tan-awa sa templechallenge.lds.org.
5. Doktrina ug mga Pakigsaad 109:22.



Ni Neill F. Marriott

Ikaduhang Magtatambag sa Kinatibuk-ang Kapangulohan sa Young Women

Pagpakigbahin sa Inyong Kahayag

Kinahanglang lig-on natong barugan ang atong tinuohan ug ipahayag ang tinuod nga doktrina.

Karon gusto nakong ikonsiderar ang duha ka importanting responsibilidad: una, kanunayng idugang ang kahayag sa ebanghelyo sa atong kinabuhi, ug ikaduha, ipakigbahin kana sa uban.

Nasayud ba mo unsa mo kaimportante? Matag usa ninyo—karon—bililhon ug importante sa plano sa Langitnong Amahan. Kita dunay buhatanon. Nasayud kita sa kamatuoran sa gipahiuli nga ebanghelyo. Andam ba kintang manalipod niana nga kamatuoran? Kita kinahanglang magpakabuhin niini; mopaambit niini. Kinahanglang lig-on natong barugan ang atong tinuohan ug ipahayag ang tinuod nga doktrina.

Niadtong Septyembre 2014 sa *Liahona*, si Elder M. Russell Ballard misulat: “Kita nagkinahanglan sa talagsaon, impluwensyal nga tingog ug hugot nga pagtuo sa mga babaye. Kinahanglan nga ilang makat-unan ang doktrina ug masabtan ang atong pagtuo aron sila makapamatuod sa kamatuoran sa tanan nga mga butang.”¹

Mga sister, gilig-on ninyo ang akong pagtuo ni Jesukristo. Nakita nako ang inyong mga ehemplo, nadungog ang inyong pamatuod, ug nabati ang inyong hugot nga pagtuo gikan sa Brazil ngadto sa Botswana! Makaimpluwensya kamo bisan asa mo moadto. Mabati kini sa mga tawo





sa inyong palibut—gikan sa inyong pamilya ngadto sa inyong mga kontak sa cell phone ug gikan sa inyong mga higala sa social media ngadto sa mga naglingkod tupad ninyo karon. Mouyon ko ni Sister Harriet Uchtdorf, kinsa misulat, “Kamo . . . mga madasi-gon nga ehemplo sa nagkadautan nga kalibutan kon inyong ipakita, pinaagi sa inyong pagpakabuhi, nga ang ebanghelyo makalipay nga mensahe.”²

Si Presidente Thomas S. Monson mipasabut, “Kon kamo gusto nga mohatag og kahayag sa uban, kamo mismo kinahanglang magsiga.”³ Unsaon nga ang atong kahayag magpabiling nagsiga? Usahay bation nako nga usa ka bombilya nga awop. Unsaon nako aron mas mohayag?

Ang kasulatan nagtudlo, “Kana nga gikan sa Dios mao ang kahayag; ug siya nga nakadawat sa kahayag, ug magpadayon diha sa Dios, makadawat og labaw pa nga kahayag.”⁴ Kinahanglan kita nga magpadayon diha sa Dios, sumala sa kasulatan. Kinahanglang moadto kita sa tinubdan sa kahayag—ngadto sa Langitnong Amahan ug ni Jesukristo ug sa mga kasulatan. Kita mahimo usab nga moadto sa templo, nasayud nga ang tanang butang sa sulod niini gitumong kang Kristo ug sa Iyang maulaong sakripisyo.

Hunahunaa ang epekto sa templo sa mga naglibut niini. Nagpanindot kini sa mga siyudad; nagdan-ag kini

sa kabungturan. Nganong nagpanindot ug nagdan-ag man kini? Tungod kay, sama sa giingon sa kasulatan, “Ang kamatuoran midan-ag,”⁵ ug anaa sa mga templo ang kamatuoran ug mahangturong katuyoan; ingon man usab kaninyo.

Niadtong 1877, si Presidente George Q. Cannon miingon, “Matag Templo . . . makapaminus sa gahum ni Satanas sa yuta.”⁶ Nagtuo ko nga bisan asa nga dunay templong gitukod dinhi sa yuta, mopapahawa kini sa kangitngit. Ang katuyoan sa templo mao ang pagserbisyo sa katawhan ug paghatag sa tanang anak sa Langitnong Amahan og kasarang sa pagbalik ug pagpuyo uban Kaniya. Dili ba susama ang atong katuyoan niining gipahinungod nga mga building, niining mga balay sa Ginoo? Ang pagserbisyo sa uban ug pagtabang nila sa pagpahawa sa kangitngit ug pagbalik ngadto sa kahayag sa Langitnong Amahan?

Ang sagradong buhat sa templo mopalambo sa atong pagtuo ni Kristo, ug unya mas makaimpluwensya sa pagtuo sa uban. Pinaagi sa makapalambo nga espiritu diha sa templo, makat-unan nato ang katinuod, gahum, ug paglaum sa Pag-ula sa Manluluwas sa atong personal nga kinabuhi.

Pipila ka tuig ang milabay ang among pamilya nakasinati og dakong problema. Miadto ko sa templo ug

didto hugot nga nag-ampo alang sa tabang. Gihatagan ko og usa ka gutlo sa kamatuoran. Nakadawat ko og klaro nga impresyon sa akong mga kahayang, ug nahingangha ko. Nianang gutlo sa espirituhanong pagkat-on, nakita nako ang babaye nga puno sa garbo nga naghimo sa mga butang sa iyang paagi, dili sa paagi sa Ginoo, ug giangkong ang bisan unsang gitawag nga kalampusan. Nasayud ko nga nagtan-aw ko sa akong kaugalingon. Nangaliyupo ko sa Langitnong Amahan, miingon, “Dili ko gusto nga maingon niana nga babaye, apan unsaon aron mausab ko?”

Pinaagi sa lunsay nga espiritu sa pagpadayag didto sa templo, gitudloan ko sa akong dakong panginahanglan sa usa ka Manunubos. Miduol ko dayon sa Manluluwas nga si Jesukristo ug gibati nga ang kasakit nahanaw ug ang dakong paglaum misulod sa akong kasingkasing. Siya lamang akong paglaum, ug gusto ko nga maduol Niya. Klaro na nako nga ang hakog nga kinaiyanhong babaye “usa ka kaaway sa Dios”⁷ ug sa mga tawo nga anaa ubos sa iyang impluwensya. Sa templo nianang adlaw akong nakat-unan nga pinaagi lang sa Pag-ula ni Jesukristo nga ang akong mapagarbuhon nga kinaiya mausab ug ako makahimo og maayo. Gibati nako ang Iyang gugma ug nasayud nga Siya motudlo nako pinaagi sa Espiritu ug mousab nako kon akong itugyan ang akong kasingkasing Niya, sa walay pagpanagana.

Nanlimbasug pa gihapon ko sa akong mga kahayang, apan misalig ko sa balaanong tabang sa Pag-ula. Kining lunsay nga instruksyon miabut tungod kay misulod ko sa balaang templo, nangita og kahupayan ug mga tubag. Misulod ko sa templo nga gibug-atan, ug mibiya ko nga nasayud nga ako dunay gamhanan gayud nga Manluluwas. Migaan ug malipayon ang akong gibati kay nadawat nako ang Iyang kahayag ug gidawat ang Iyang plano alang nako.

Gibutang sa tibuok kalibutan, ang mga templo nga dunay talagsaong porma ug desinyo sa gawas, apan sa sulod ang tanan dunay sama nga

mahangturong kahayag, katuyoan, ug kamatuoran. Sa 1 Mga Taga-Corinto 3:16 atong mabasa, “Wala ba kamo masayud nga kamo templo sa Dios, ug nga ang Espiritu nagapuyo diha sa sulod ninyo?” Kita usab isip anak nga mga babaye sa Dios gibutang sa tibuok kalibutan, ug kita dunay talag-saong porma ug desinyo sa gawas, sama sa mga templo. Kita adunay espirituhanong kahayag usab, sama sa mga templo. Kining espirituhanong kahayag usa ka dan-ag sa kahayag sa Manluluwas. Ang uban madani niini nga kahayag.

Kita dunay kaugalingong mga tahas sa yuta—gikan sa anak nga babaye, inahan, lider, ug magtutudlo ngadto sa sister, trabahante, asawa, ug daghan pa. Matag usa dako og impluwensya. Matag tahas dunay moral nga gahum samtang atong ipakita sa atong kinabuhi ang mga kamatuoran sa ebanghelyo ug mga pakigsaad sa templo.

Si Elder D. Todd Christofferson miingon, “Sa tanang hitabo, ang inahan makaimpluwensya nga dili matupngan sa ubang tawo o sa bisan unsang relasyon.”⁸

Dihang mga bata pa ang among mga anak, gibati nako nga sama sa co-captain, uban sa akong bana, si David, sa usa ka barko, ug akong gitan-aw ang akong 11 ka mga anak isip grupo sa mga sakayan nga naglutaw libut namo sa dunggoanan, nangandam sa paglawig sa dagat sa kalibutan. Si David ug ako mibati nga kinahanglan og kompas sa Ginoo matag adlaw aron masayud asa molawig uban sa among gamayng grupo.

Ang akong mga adlaw puno sa makalimtan ra nga mga butang sama sa pagpilo sa mga linabhan, pagbasa sa mga basahon sa mga bata, ug pagluto alang sa panihapon. Usahay sa dunggoanan sa atong panimalay, dili nato makita nga pinaagi niining yano, kanunayng gibuhar—lakip na ang pamilya nga pag-ampo, pagtuon sa kasulatan, ug family home evening—dunay dagkong mga butang ang mapahinabo. Apan ako mopamatuod nga kini nga mga buhar nagdala og mahangturong nga kamahinungdanon. Dakong kalipay moabut kon kanang gagmayng

sakayan—atong mga anak—motubo nga bantugang barko nga puno sa kahayag sa ebanghelyo ug andam nga ma-“anaa sa pangalagad sa Dios.”⁹ Ang ginagmayng buhar sa pagtuo ug pagserbisyo maoy makapadayon diha sa Dios ug magdala og mahangturong kahayag ug himaya sa atong pamilya, mga higala, ug kaubanan. Kamo maka-impluwensya gayud sa uban!

Hunahunaa ang impluwensya sa hugot nga pagtuo sa usa ka Primary nga bata diha sa iyang pamilya. Ang hugot nga pagtuo sa among anak nga babaye nakapanalangin sa among pamilya dihang nawala ang among anak nga lalaki sa amusement park. Ang pamilya nagkabuang na og pangita niya. Ang among nuybe anyos nga anak nga babaye migunit nako ug miingon, “Ma, dili ba ta mag-ampo?” Sakto siya! Ang pamilya nag-alirong nga dunay daghang tawo nga nanan-aw ug nag-ampo nga makit-an ang among anak. Nakit-an namo siya. Sa tanang batang babaye nga Primary moingon ko, “Palihug pahinumdomi kanunay ang inyong ginikanan nga mag-ampo!”

Niining summer nakatambong ko og kamping sa 900 ka batan-ong

mga babaye sa Alaska. Hilabihan ang impluwensya nila ngari kanako. Miadto sila sa kamping nga espirituhanong andam, nakabasa sa Basahon ni Mormon ug nasag-ulo ang “Ang Buhi nga Kristo: Ang Pagpamatuod sa mga Apostoles.” Sa ikatulong gabii sa kamping, tanang 900 ka batan-ong mga babaye mibarug ug gi-recite ang tibuok dokumento matag pulong.

Ang Espiritu mipuno sa tibuok palibut, ug gusto kong moapil. Apan dili ko makahimo. Wala pa ko kasag-ulo.

Nagsugod ko og kat-on sa mga pulong sa “Ang Buhi nga Kristo” sama sa gihimo niining mga sister, ug tungod sa ilang impluwensya mas hingpit nakong nasinati ang pakigsaad sa sakrament nga kanunayng mohinumdom sa Manluluwas samtang gibalik-balik nako ang pagpamatuod sa mga Apostoles kang Kristo. Ang sakrament mas milawom ang kahulugan alang nako.

Ang akong panghinaut nga mohalad sa Manluluwas og regalo sa Pasko niining tuiga nga masag-ulo ug motuhop sa akong kasingkasing ang “Ang Buhi nga Kristo” inigka-Disyembre 25. Unta mahimo ko nga impluwensya



alang sa kaayohan—sama sa nahimo sa mga sister sa Alaska nako.

Makita ba ninyo ang inyong kaugalingon diha sa mga pulong niini nga dokumento, “Ang Buhi nga Kristo”? “Siya mihangyo sa tanan sa pagsunod sa Iyang panig-ingnan. Siya naglakaw sa mga dalan sa Palestina, nag-ayo sa masakiton, naghimo nga ang buta makakita, ug nagbuhi sa patay.”¹⁰

Kita, mga sister sa Simbahan, wala maglakaw sa mga dalan sa Palestina nga nag-ayo sa masakiton, apan mahimo kitang mag-ampo ug gamiton ang makaayo nga gugma sa Pag-ula sa nadaut, nagkaproblema nga relasyon.

Bisan og kita dili makahimo nga ang buta makakita sama sa Manluluwas, makapamatuod kita bahin sa plano sa kaluwasan ngadto sa buta sa espiritwal. Makapabuka kita sa mata sa ilang panabut sa kaimportante sa gahum sa priesthood sa mahangturing mga pakigsaad.

Dili kita makabuhi og patay sama sa gihimo sa Manluluwas, apan makapanalangin kita sa mga patay pinaagi sa pagpangita sa ilang mga ngalan alang sa buhat sa templo. Dayon mabuhi gayud nato sila gikan sa bilangoan sa espiritu ug motanyag nila sa dalan sa kinabuhing dayon.

Ako mopamatuod nga kita dunay buhi nga Manluluwas, si Jesukristo, ug uban sa Iyang gahum ug kahayag makapapahawa kita sa kangitngit sa kalibutan, makapamatuod sa kamatuoran, ug makaimpluwensya sa uban sa pagduol ngadto Kaniya. Sa pangalan ni Jesukristo, amen. ■

MUBO NGA MGA SULAT

1. M. Russell Ballard, “Mga Lalaki ug mga Babaye ug ang Gahum sa Priesthood,” *Liahona*, Sept. 2014, 36.
2. Harriet R. Uchtdorf, *The Light We Share* (Deseret Book Company, 2014), 41; gigamit pinaagi sa pagtugot.
3. Thomas S. Monson, “For I Was Blind, but Now I See,” *Liahona*, Hulyo 1999, 69.
4. Doktrina ug mga Pakigsaad 50:24.
5. Doktrina ug mga Pakigsaad 88:7.
6. George Q. Cannon, sa *Preparing to Enter the Holy Temple* (booklet, 2002), 36.
7. Mosiah 3:19.
8. D. Todd Christofferson, “Ang Moral nga Impluwensya sa mga Bbaye,” *Liahona*, Nob. 2013, 30.
9. Doktrina ug mga Pakigsaad 4:2.
10. “Ang Buhi nga Kristo: Ang Pagpamatuod sa mga Apostoles,” *Liahona*, Abr. 2000, 2.



Ni Presidente Dieter F. Uchtdorf

Ikaduhang Magtatambag sa Unang Kapangulohan

Pagsunod sa Ebanghelyo nga Malipayon

Salig diha sa makaluwas nga gahum ni Jesukristo; sunda ang Iyang mga balaod ug mga sugo. Sa ato pa—pagsunod sa ebanghelyo nga malipayon.

Minahal kong mga sister, akong mga higala ug bulahang mga disipulo ni Jesukristo, akong dungog nga makabaton niining oportunidad nga makauban kamo sa atong pagbukas sa laing kinatibuk-ang komperensya sa Ang Simbahan ni Jesukristo sa mga Santos sa Ulahing mga Adlaw. Sa moabut nga semana ang Unang Kapangulohan ug ang Napulog Duha ka mga Apostoles makighimamat sa tanang mga General Authority ug kinatibuk-ang mga lider sa auxiliary, ug ang mahabiling mga sesyon sa atong tibuok kalibutan nga kinatibuk-ang komperensya mosunod pagka-Sabado ug Dominggo. Mapasalamaton kaayo ko ni Presidente Thomas S. Monson ang propeta sa Dios sa atong panahon, sa paghangyo kanako sa pagrepresentar sa Unang Kapangulohan samtang ako mamulong sa mga sister sa Simbahan.

Sa akong pagpamalandong kon unsay akong isulti, nakahunahuna ko og balik sa mga babaye nga

nakaimpluwensya sa akong kinabuhi ug nakatabang nako nga makalatas sa mga hagit sa mortalidad. Mapasalamaton ko sa akong lola kinsa mga dekada na ang milabay nakahukom sa pagdala sa iyang pamilya ngadto sa usa ka sakrament miting sa mga Mormon. Mapasalamaton ko kang Sister Ewig, usa ka edaran nga dalagang German, kansang ngalan kon hubaron sa Iningles mao ang “Sister Eternal.” Siya ang mipadangat niining maisugon ug talagsaong pagdapit sa akong lola. Mapasalamaton kaayo ko sa akong mama, kinsa migiya sa upat ka mga anak agi sa kagubot sa Ikaduhang Gubat sa Kalibutan. Nagahunahuna sab ko sa akong anak nga babaye, mga apong babaye, ug umabut nga mga henerasyon sa matitud-anong mga babaye kinsa mosunod ugma damlag.

Ug, siyempre, mahangturon ang akong pasalamat sa akong asawa, si Harriet, kinsa nakadani nako isip batan-on, mipas-an sa kinabug-atan